

7. april 2014

UPA 2014/18  
Evelyn Frederiksen

**Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalakkersuisunut kaammattuutigaa nunani avannarlerni killerni innuttaasut akornanni arnat ikiliartornerannik ajornartorsiut pillugu nassuiaasioqqullugit. Sammisaaq tamanna pillugu ilisimatuutut allaatigisani, ilisimatusarnermi isumaliutissiissutini misissuinernilu inerniliinerit nassuiaammi eqiterneqassapput aammalu arnat Nunani Avannarli Killerni pitsaanerusumik atugaqalernissaanut peqataaqataasinnaasunut suliniutinut siunnersuutinik imaqassalluni. (Aallartitat siulittaasuat Lars-Emil Johansen)**

Siumumi ilungersunartutut isigaarput inuaqatigiit suaassutsimikkut annertuumik nikingasuteqariartornerat, soorlu Naalakkersuisup akissuteqarnermini allaaserigaa naatsorsueq-qissaartarfimmit kisitsisit takutikkaat arnat angutinit 3000-it tikillugit ikinnerunerat, tamanna inuaqatigiit amerlassutsimikkut ineriartorneranut annertuumik sunniuteqarsinnaamat aarlerinartutut isigaarput. Soorlu savalimmiuni arnat angutinit ikinnerunerat pissutaalluni inuaqatigiit ikiliartulerneranik kinguneqariartortoq.

Tunngavissiuinermi nassuiaatissarsionermilu siumi Nunat Avannarliit Killiit inassuteqaataat annertuumik taperserumavarput, soorluttaaq siunnersuutip oqariartuutaa imarigaat, ator-tussat amerlassuut pissutsinik tamakkuninnga itilisiissutaasut Norgimi, Danmarkimi nuna-nilu Avannarlerni Killerni suliarineqarput.

Nordregio, Nora aammalu Folketingimi Atlantikup avannaani suleqatigiit assersuutigalugu nassuiaatinik taamaattunik arlalinnik saqqummiussaaput. Saqqummiunneqartulli anner-tunerusumik tikkuussingillat.

Taamaattumik siunnersuutigineqartutuut immikkut ittumik ilisimasaqarluni ataatsimiititalia-mik nunani avannarlerni killerni pilersitsinissaaq Naalakkersuisut suleqatigiissutigissagaat siunnersuutigineqarpoq, taanna assersuutigalugu Nunanit Avannarlernit Killernit pingasunit tamanit inuaqatigiit pillugit ilisimatusartunik inuttalernerqarsinnaalluni. Ataatsimiititaliaq taanna nassuiaasiornermik suliakkerneqassaaq, tamatumani ajornartorsiut tamanna pil-lugu atortussanik pissarsiarineqarsinnaasunik (ilisimatusarnermit isumaliutissiissutinik, mi-sissuinernik aammalu ilisimatuutut allaaserisanik) katersuisoqassalluni takussutissi-ortoqassallunilu kiisalu tamanna aallaavigalugu inernilisoqassalluni. Suliami tamatumani pingaarnertut anguniagaq tassaassaaq ataqatigiittumik nassuiaasioqassalluni.

Taamatut naatsumik oqaaseqarluta Siumumiit siunnersuuteqartoq tamakkiisumik taper-serparput.